

FORUM ONG TIMOR LESTE

THE TIMOR LESTE NGO FORUM



Rua do Mercado Municipal, Dili -Timor Leste /Mobile Phone 77999304/77236782 /forumong.tl@gmail.com /joaofreitas.fongtil.com

Deklarasaun hamutuk Organizasaun Sosiedade Civil Kona ba Seguransa Ai-han no Nutrisaun Iha Timor Leste

16 Outubru 2019

Uluk nana'in, OSC hakarak louva agrikultór sira hotu iha Timór laran tomak ne'ebé kontinua servisu maka'as hodi halo produsaun ai-han ba ema hotu, maski hasoru dezafiu no problema oin-oin. Loron importante ne'e mós, hanesan momentu di'ak atu bolu Governu, Parlamentu Nasionál, Prezidente Repúblika no ba Públiku tomak nia atensaun ba situasaun real iha Timor-Leste liga ba produsaun ai-han no nutrisaun iha rai laran, ita nia dependénsia maka'as ba importasaun ai-han inklui problema sosiál no ekonomia iha rai

Organizasaun Sosiedade Civil (OSC) maka parseiru ne'ebé partisipa ativu iha forum diálogu hodi mantein relasaun di'ak ho instituisaun órgaun soberania no parseiru dezvoltamentu iha prosesu harii nasaun. Iha Timor-Leste, OSC organiza an iha Forum ONG Timor-Leste (FONGTIL). Ho membru hamutuk 348 ne'ebé kompostu husi 304 ONG nasionál no 44 ONG internasionál. FONGTIL sai hanesan organizasaun sombriña ba OSC sira ne'ebé harii ho karakteristiku la buka lukru, non partidáriu no non-sectarian. Nudár organizasaun independente, FONGTIL iha nia knar prinsipál atu hala'o kontrolu sosiál no haforsa sosiedade sivil iha prosesu dezvoltamentu nasionál.

FONGTIL nia membru balun halibur an iha rede no membru sira seluk hala'o servisu mesak, OSC kontinua implementa sira nia programa ka projetu oin-oin hanesan: Agrikultura, Ekonomia, Saúde, Edukasaun, Be moos, Adaptasaun ba Klimátika, Asesu ba Rai, Direitus Umanus, Peskiza, Advokasia no monitorizasaun. Ligadu ho area SAN, OSC sira kontinua implementa programa no prioridade iha area tarjetu ida-idak nian, maske seidak atinje rezultadu ne'ebé signifikativu, maibé sira kontinua servisu no hala'o sira nia knaar tuir targetu no kbiit organizasaun idak-idak nian no enfrenta mós dezafiu oin-oin.

Hodi harii entendimentu/kompriensaun komún ba dezafiu ne'ebé kompleksu no multidimensional kona ba inseguransa ai-han no malnutrisaun, ita hakarak kria base ba solusaun iha tempu naruk. Ida ne'e presiza aproximasaun multi disiplinár ne'ebé tau

hamutuk perspetiva polítika no téknika ne'ebé reflata ita nia valor, identidade kultura, relasaun sosiál no soberania.

Hasa'e Ita Nia Impaktu Iha Area SAN

Iha Timor-Leste, malnutrisaun sei buras iha area rural no urbanu, iha uma-kain ho nivel rendimentu oiain. Relatório IPC (2018) hatudu katak porsentu 36 populasaun Timor Leste enfrenta inseguransa ai-han ho nutrisaun ne'ebé króniku¹. Impaktu husi inseguransa ai-han mak mosu defisiénsia nutrisaun króniku ne'ebé estraga dezvoltimentu fíziku no mental labarik sira nian. Ida ne'e bele haree bainhira labarik ida nia altura badak liu nia otas. Dala barak hahú molok labarik moris tanba inan la hetan nutrisaun di'ak, no sai aat liu tan tanba alimentasaun ne'ebé la adekua ba labarik sira. Atu prevene ida née, ita presiza servisu maka'as iha setór oin-oin hanesan saúde, bee, sanitasaun, edukasaun, planeamentu familiár, agrikultura, diversifika ai-han, fó ai-han nutritivu ba labarik no inkluziun sosiál.

Durante tinan 18 ona, governu Timor-Leste no ajénsia dezvoltimentu sira gasta ona osan tokon ba tokon hodi dezvoltive setór agrikultura no setór relevante sira. Maibé infelizmente, dados estatística husi governu nian rasik hatudu katak seidauk iha mudansa signifikante ne'ebé mak atinje. Produsaun agrikultura kontinua la hetan kreximentu signifikante. Hanesan ezemplu, iha 2005 ita nia produsaun foos mak 35, 335 tonelada². Iha 2018/2019 Ministériu Agrikultura projekta katak ita sei prodús 38,241 tonelada³. Kreximentu ida nee ki'ik tebe-tebes kompara ho osan sira ne'ebé governu gasta ona. Ba Ministériu Agrikultura, dezde 2008 too oras nee, governu aloka/gasta ona orsamentu tokon 250 dollar resin. Ita nia merkadu sira, nafatin domina husi ai-han importadu, liu-liu foos. Iha tinan 2018/2019 ita sei importa foos maizumenus 143,614 tonelada, no batar besik 30,000 tonelada⁴. Ida nee ita seidauk konta tan produtu ai-han seluk hanesan naan, modo, fore, no ai-fuan sira. Ita in-kapasidade atu prodús ai-han bai ta nia populasaun rasik no ita nia dependénsia maka'as ba ai-han husi rai li'ur ne'ebé dala barak kontaminadu no la iha qualidade di'ak e nutritivu. Problema hirak nee hotu, kontribui ba inseguransa ai-han no malnutrisaun iha Timor-Leste.

Tuir OSC nia observaun, durante ne'e governu fó liu prioridade ba hasa'e produsaun foos no batar hodi introduz input oi-oin no la fó atensaun ba prodús produtu sira ne'ebé iha valór saudavel, nutritivu no ba ekonomia komidade, hanesan hortikultura, pekuaria, plantas frutas no peska. iha realidade, investimentu boot barak ba iha irrigasaun eskalaun bo'ot hodi fornese bee ba natar sira, maibé la dun iha investimentu hodi estabese sistema irrigasaun ka sistema kolleita bee eskala ki'ik, iha nivel Aldeia no Suku, hodi fornese bee nato'on ba

¹ IPC, 2019. The First IPC Analysis Report On The Chronic Food Insecurity Situation In Timor-Leste.

http://www.ipcinfo.org/fileadmin/user_upload/ipcinfo/docs/3_IPC_Timor%20Leste_CFI_20182023_English.pdf

² Relatoriu Annual Konsantil 2014

³ Bulletin Seguransa Aihan Timor-Leste Nu. 19 Abril -Juñu 2019

⁴ Ibid

família hodi halo produsaun modo, hakiak animál, hakiak ikan nsst. iha nivel uma kain no comunidade.

OSC hakarak fó hanoin fali katak, Planu Estratéjiku Dezenvolvimentu Nasionál 2011-2030 enviziona Timor-Leste atu sai nasaun ne'ebé iha ekonomia diversifíkadu no modernu, iha auto sufisiénsia ai-han, no agrikultura subsisténsia transforma ba agrikultura komersiál no proprietáriu ki'ik (smallholders). Kaer mós ba PM RDTL (VIII governu) nia vizaun kona ba Hisik kosar ba moris di'ak no sei la husik ema ida iha kotuk. Vizaun furak hirak ne'e hotu rekere no ezije planu dezenvolvimentu ne'ebé tenke integradu, kondenu no fó prioridade ba diversifikasaun ekonómiku, diversifikasaun ai-han, no atensaun ba agrikultura iha nivel família no comunidade.

Tinan 2019 to 2028 nee, organizasaun mundiál ba ai-han no agrikultura (FAO), hamutuk ho parseiru internasionál no nasional sira, deklara ona nudár dékada (tinan sanulu) ba agrikultura familiar⁵. Deklarasaun nee refleta esperiénsia no peskiza iha nasaun barak ne'ebé hatudu katak agrikultura familiar mak sistema ne'ebé bele kontribui di'ak liu ba hamenus kiak, malnutrisaun, no di'ak liu ba ambiente⁶. Ho hanoin hirak nee, no mós refleta ba situasaun real seguransa ai-han no nutrisaun iha ita nia rain. Organizasaun Sociedade Civil iha Timor-Leste hato'o rekomendasaun ba:

I. Ba Governu Timor-Leste

1. Suporta agrikultures eskala ki'ik liu no hametin agrikultura familiar ho agro-ekologia
2. Hasa'e kuantidade, qualidade no variedade ai-han liu husi hadi'ak asesu ba informasaun/koñesimentu no teknolojia ne'ebé adekuadu
3. Promove no utiliza ai-han lokál hodi hamenus dependénsia ba importasaun ai-han suplementu hanesan micronutrient (plumpynut, plampydos no sst).
4. Presiza iha laboratóriu atu halo teste ba ai-han importasaun no ai-han rai laran inklui monitorizasaun no jestaun armazenamentu ba konserva ai-han iha TLS.
5. Husu ba governu tenke fó lisensa de'it ba importasaun ai-han ne'ebé Sertifika atu garantia ai-han nia qualidade no 'safety' tuir padraun internasionál, hodi proteje saúde populaun no prevene moras hada'et sira
6. Haforsa no sensibiliza ba comunidade kona ba programa integradu liu husi kuidadu bebé foin moris, saúde maternal, nutrisaun ba kontektu kuidadu saúde primária.
7. Mantén nafatin programa "povu kuda, governu sosa" hodi fornese ai-han ba; merenda eskolár, ospital, polisia, forsas armadas no protesasaun sosiál hodi haforsa ekonomia lokál no hamenus importasaun.
8. Investe orsamentu ba formasaun no sensibilizasaun kona ba nutrisaun foku ba alimentasaun saudavel ba labarik ho idade tinan lima mai kraik no fetu ho idade reprodutivu.

⁵ FAO, 2019. United Nations Decade of Family Farming 2019 – 2028.

<http://www.fao.org/3/ca4672en/ca4672en.pdf>

⁶ Ibid.

9. Aumenta saúde no nutrisaun iha kurríkulu Eskola no apoiu programa kampaña nutrisaun iha 12 Munisipiu no RAEOA.
10. Kapasita didi'ak foin sae sira, kiria servisu atrativu no hametin investimentu ba agrikultura, hortikultura, plantas frutas, peskas, pekuaria hodi prodús no garante ai-han saudavel, nutritivu ba povu no ekonomia rai laran.

II. Ba Parseiru Dezenvolvimentu

- Ajénsia no ONG Internasionál sira tenke adopta no ajusta programa no prioridade sira nian tuir programa governu nian hodi responde ba nesesidade rai laran.
- Harmoniza servisu hotu ba hadi'ak nutrisaun iha Timor-Leste ne'ebé implementa husi parseiru dezenvolvimentu sira hanesan WFP, UNICEF, WHO, Projetu Hatutan, etc.

III. Ba Oportunidade no Kolaborasaun Parseria ne'ebé Inovativu

- Involve OSC partisipa iha diskusaun Planu Annual no Orsamentu Governu nian liu-liu iha Ministériu Saúde (MS), Ministériu Edukasaun (ME), Ministériu Agrikultura e Peska (MAP), Ministériu Komérsiu Indústria Ambiente (MCIA)
- involve OSC iha KONSSANTIL iha nivel Ministru nudár Observadór (FONGTIL no HASATIL) no iha grupu tékniku Permanente (GTP) membru ne'ebé hili husi FONGTIL no HASATIL
- Desentralizasaun ba koordenasan no orsamentu (fó podér ba Gov. Lokál)
- Evita servisu duplu iha terrenu no servisu tenke apár ho planu Governu nian.

IV. Ba Aproximasaun, Teknolojia nsst

- Utiliza teknolojia apropriadu no sistema mekanizasaun agrikultura;
- Fasilita asesu kréditu (funan ki'ik) ba agrikultór sira liu husi banku movel
- Konservasaun bee inklui halo Barrajen (bendungan) iha fatin ne'ebé poténsia
- Konservasaun agrikultura ho tékniku ne'ebé orgániku

Prioridade atu atinje SAN iha Timor-Leste

- Diversifikasaun ai-han no hasa'e produsaun ai-han lokál hahú kedan husi nivel aldeia
- Suporta agricultures eskala ki'ik liu no hametin agrikultura familiár ho agro-ekologia
- Investe orsamentu ba formasaun no sensibilizasaun kona ba nutrisaun foku ba alimentasaun saudavel ba labarik ho idade tinan lima mai kraik no fetu ho idade reprodutivu.
- Kapasita didi'ak foin sa'e sira, kria servisu atrativu no hametin investimentu ba agrikultura, hortikultura, plantas frutas, peska, pekuaria hodi prodús no garante ai-han saudavel, nutritivu ba povu no ekonomia rai laran.
- Ajénsia no ONG Internasionál sira tenke adopta no ajusta sira nia programa no prioridade tuir governu nia programa no harmoniza programa sira hotu husi ajénsia no organizasaun internasionál sira ne'ebé foku ba asuntu nutrisaun.
- Utiliza teknolojia apropriadu no sistema mekanizasaun agrikultura; Konservasaun bee inklui halo Barrajen (bendungan) iha fatin ne'ebé susar bee.